

續
碑
傳
集



續碑傳集卷六十八

江陰繆荃孫纂錄

忠節十五

唐忠壯公墓志銘

方濬猷

公姓唐氏諱殿魁字蓋臣合肥人曾祖璧祖大經父夙儉世有隱德公賦性剛直好任俠咸豐三年粵寇陷金陵皖北盜賊四起公隨同劉軍門銘傳集鄉人申明大義以兵法部勒子弟賊來輒擊走之十年援六安解其圍拔補千總同治元年始應募隸銘字營駐軍滬上敘迭攻南匯川沙等廳縣功擢守備

賞藍翎又敘攻克南匯川沙金山衛奉賢柘林青浦各城並擊退虹橋賊功擢都司

賞換花翎二年正月賊攻常熟並踞楊舍福山各汛公航海抵福山先解常昭之圍進薄楊舍賊列陣相抗公身先士卒大軍繼之賊盡卻公乘勝窮追骸中鉛丸深入肌理剗去之裹創復戰遂拔之

賜振勇巴圖魯名號擢游擊又擢參將

晉副將銜記名總兵是年十一月銘軍攻常州奔牛鎮踞賊邵之倫乞

降許之時東南北三面合圍唯西通丹陽一路地險賊眾咽喉之地賊所必爭之倫雖以地獻必得我軍助守其心始固乃令公與副將黃桂蘭各率所部往公甫至而常州丹陽之賊果分道來犯力戰卻之自顧兵單瀕河而營賊初不察虛實及夕偵之止二營乃率眾環攻公告桂蘭曰奔牛爲常州門戶我今舍此而去之倫必不能守則常州一軍危矣計唯有死守待援桂蘭以爲然相與誓師眾皆感奮水賊駕礮舟轟擊岸賊亦乘勢進薄相持二十餘日賊屢攻敗戕數百人而公所部五百人亦傷亡過半勢幾殆劉軍門銘傳裹創赴援苦戰數日士氣益振與援夾擊大破之追逐十餘里殲賊酋並悍卒無算是役也公以一旅之師拒水陸賊十餘萬忍饑寒甲志不少挫卒能會合援師保全要隘常州迎刃而下一戰之力也上功以記名提督

簡放四年四月統銘字右軍六營渡淮勦捻爲游擊之師日行百數十里公必前驅不以爲苦且戒其麾下將弁曰戎輩布衣受

國恩身膺將領一營之費月縻帑三千若稍耽安逸不思殺賊報

國何以爲人效命疆場吾儕分內事死且不懼敢云勞耶聞者咸爲心動公平時撫循士卒若子弟然號令嚴肅有犯必懲所到之地體恤民

艱不令枉取一草一木民尤感之五年補浙江衢州鎮總兵遷廣西右江鎮總兵迨六年正月十五日與賊戰於天門之尹隆河爲賊所乘全軍盡覆公憤甚策馬直前手刃數十賊所乘馬中飛礮墜河力竭遇害年甫三十有六事聞議卹

贈太子少保銜

予謚忠壯國史立傳江蘇湖北及安徽本籍均建立專祠

賞騎都尉兼一雲騎尉世職公兄弟五人齒居四配宋夫人子治堯今福建陸路提督俊侯爲公之弟與予交莫逆持公之狀來告曰吾兄沒於王事忽忽已九年矣將以某年某月某日葬乞吾子爲文以彰其節傳示子孫感且不朽予弗獲辭爲之銘曰

以少勝多以守爲戰如公之勇足當一面功蓋三吳名達

九重盡瘁而已不尸其功兵貴神速有進無退忠哉壯哉甘陷危地公之靈爽助季平番險逾鹿耳威揚虎門戡戡佳城以窺以窺傳之千秋

視此貞石

高勇烈公別傳

李元度

高公諱連陞字果臣甯鄉人咸豐四年投效湘軍隸曾文正戲下厯保

千總

賞藍翎是年湘軍分三營蔣君益澧將左公屬焉六年會攻武昌埽平城外賊壘晉守備七年武昌復平斬黃賊巢破賊小池口乘勝復湖口彭澤望江東流銅陵諸縣公皆在事有功晉都司奉檄充果勇營營官八年廣西寇急請濟師蔣君以知府帥師往援公從克柳州遷游擊又克慶遠遷參將十年守桂林有功

詔以副將用又攻克賀縣加總兵銜

賜號尙勇巴圖魯繼克潯州

詔以總兵記名簡放同治元年補左江鎮總兵當是時杭州已前陷曾公爲兩江總督疏調蔣君援浙

詔改浙江布政使公遂帥師入浙從浙撫左公宗棠克壽昌進攻蘭谿湯溪盡奪其要隘八年正月拔湯溪禽首逆李尙陽誅之進擣白龍橋蘭溪賊棄城遁乘勝復龍游金華得

旨以提督用二月攻富陽時賊勢猖獗總兵熊君建益戰死公悉銳攻勦八月克之十二月進攻餘杭斬逆渠鄧光明三年正月蔣君攻杭州公會諸將昇巨礮轟城門城崩賊恟懼夜五鼓棄城遁餘杭賊亦遁浙

江平

賞穿黃馬鞋

命署浙江提督進攻湖州七月拔之殘賊竄福建時左公遷督浙閩疏調公援剿公遂入閩漳州久不下公至則大捷屢梟逆渠

詔換穆特本巴圖魯號漳州復再

賞玉決拾翎管大小荷囊火鏹諸品四年擢廣東提督適金陵殘孽竄踞嘉應州公帥師會攻拔其城盡殲逆黨粵賊平

詔賞雲騎尉世職甘肅回匪稱亂左公改督陝甘疏調公援剿

詔改公甘肅提督公至屢告捷破賊壘百數斬馘無算賊望風駭潰居亡何有叛勇之難楚軍之西剿也地殘破糧價翔貴又南人不諳麪食既而餉日絀麪食亦不飽黠者因煽爲亂八年二月二十四日部下副將鄧玉魁楊玉魁屯宜君縣總兵唐畢賢屯楊店三營同時叛出不意夜犯大營公遂遇害事聞斬兩玉魁軍中

優詔褒閔照提督陣亡例從優

賜卹

子諡勇烈

敕殉難地方及本籍各建專祠入祀京師昭忠祠

予騎都尉兼一雲騎尉世職同時殉難者曰提督銜總兵黃君毓馥總兵銜副將賀君茂林同知銜浙江補用知縣謝君生春四川補用副將高君英舉等並

賜卹有差附祀公祠

贊曰公束髮從戎名在天下顧不死於賊而死於叛將禍固常出於所備之外哉軍興論將才能與公比烈者屈指可數計若其死之獨異亦惟公有餘痛也烏虜莫之致而致者天也天實爲之謂之何哉

趙剛節公神道碑銘

黎庶昌

公諱德光字輝堂郎岱張氏少隸提督趙德昌戲下數從征伐冒姓趙有大功於黔黔之人皆樂稱趙氏遂不復改黔亂之興至同治五六年而極公嘗以孤軍枝柱省垣蔽翼三府七州十一廳縣之地勇冠三軍所向無敵中外皆以名將目之公亦自以討賊爲己任也咸豐六年始由勇丁征剿雲南回匪積功保六品軍功藍翎八年雲貴總督吳振械飭令回黔剿匪於平越一帶以千總拔補賞五品頂戴十年克復修文縣城擢都司

賞換花翎苗匪踞獨山州城攻拔之北徇下羊場巴香直抵清水江割平四十餘壘明年破賊沙潭江口再捷於主戎山威名由是漸起

賞豪勇巴圖魯名號同治元年進攻王卡王卡者在清水江外賊之老巢也山箐深峭公得降人訶知賊以腰蘿溪新寨巖爲門戶旁則花巖梯子巖閒道走蘿溪公分軍塞其旁別遣奇兵瞰寨巖後而建旗鼓自將當其前與賊爭山累肩越壘以進氣銳甚遂奪王卡拔出男婦數千人追至尙太平毀賊寨而還眾聲大和

命以副將留黔補用二年克復舊縣補都勻協副將記名總兵三年公方營東山平圖霸芒而省門告警率師回轍縱擊於紅邊北衛大膊於永樂堡再蹙之小箐又以其閒收復龍里與賊戰於城內江西街賊陷鎮西衛攻清鎮廣順定番長寨俱失公引兵而西連下數城出奇制勝所在戰克復北定開州修文賊逼青巖又南出貴定龍里黔西大定望援切巡撫張公亮基檄公往應公自開州橫出陸廣河埽蕩而前又以次截定已而開修再失公憤禍變之靡已也益晉部曲而申討之警備不虞雖以記名提督迭署古州安義鎮總兵遙領而已方是時省之南則潘名杰省之北則何得勝二巨憝者卵翼其閒又傳以苗教回狎黨

嗥朋咻羣盜如麻公提孤軍當四戰地數不滿六千頻年轉戰無一虛
日餉餽實竭至或忍饑赴敵露處於嚴風酷雨之中終日荷戈不獲一
飽而含宏淵默未嘗一見顏色人咸以爲難愈益欽敬其攻賊也尤善
爲超距鵬劫之法賊莫知所爲備皆畏懼之號曰鐵腳板云五年擢署
貴州提督正月克復永甯州城踐血而西楚募役司踔張官堡掇翁貴
廣興撤賊而東趾倉坡陪舊縣益黃土坎軍久無功張公令圖油溪公
曰貴定百里皆賊雖有忠義永固諸團僅能自守一隅不足以牽賊勢
某以孤軍深入而獲城洛白諸隘係賊藩籬無軍進討今張樑李忠恕
童三元等咸觀望不進使賊得專并一路乘我後軍此劉廣橋民屯所
以被襲也兵則愈疲愈少賊則日戰日多沉油溪在黃土坎後其能越
寨進剿乎會暑疫回省其秋赴援安順追賊至頭鋪二鋪大破之安順
圍解六年春再援定番出賊不備疾馳至穿心堡乘雷電中奮擊士皆
殊死鬪賊大潰墜崖罌樹死者以萬計斬賊酋許八大等進迫花山降
二十餘屯直抵底季登山營兩峰間斷賊樵汲遂拔陳喬生逆巢聲威
大震遠近快之

賞換博奇巴圖魯旋密疏奏保按察使鮑桂生請破格擢用

上以公武臣擅保文員

命傳旨申飭郎岱賊入安平公乘勝要敗於蘆荻哨日加晡率數騎渡河度地勢驟中伏鎗墮馬從者驚潰賊出剖心裂腹攫公首以去同治六年七月初五也年纔三十越二十日趙德昌所遣守備楊嗣基接應公者至公死所賊猶未退哭皆痛憤見紅巾賊十餘負公首疾馳嗣基揮騎窮追及之沙子哨悉數殲滅奪回事聞上悼惜殊甚加太子少保銜照提督陣亡例賜卹死事地方及貴州省城郎岱廳原籍建立專祠

子諡剛節

賞騎都尉兼一雲騎尉世職曾祖某祖某考某

贈振威將軍妣某某氏皆一品夫人配雷夫人生子甫彌月耳某年月日葬某里某山公之行軍也一以愛民爲主有警卽赴如患難之在其身以故百姓戴若慈父母諸路告急皆求提督親行一聞公至相率輸豬雞菜果或炊飯以待及其卒也士民皆巷哭失聲悲痛至不忍聞嗚呼忠且仁已銘曰

世變之興利賴賢哲文武同涂有殄斯滅黔亂紀餘孰爲其烈文則銅

山武則剛節惟公首出光嶽所分將材天授匪由學廩票姚冠軍氣吞
凶逆匹馬入陳萬夫辟易人方卻退公獨撼堅眾如振槁公屹若山爲
民復讎視如家事有功莫居遇險弗避嗟我黔士君子六千豈無軀命
誓與同捐感公忠勤不忍背畔萬棘千艱共濟時難中道而脫隕此長
城震驚邊徼人喪父兄莫敖衛楚不知所益決腹斷脰以憂社稷公實
近是大勇忘身千載墮淚視此刻文

甘肅甯靈廳劉忠壯公祠堂碑

周壽昌

咸豐朝粵寇捻寇庚續造亂海內無救字時回匪起於秦未熾也迨同
治初兩寇平而回患迺肆湘鄉劉忠壯公初以廣東陸路提督統湘軍
剿捻入關清陝北而陝甘兩地逆回尙陷靈州公乃由定遠率兵入橋
甯夏大薶花馬池踏下橋大搏靈州州城復公更薶賊於金積堡老巢
金積堡者隸靈州地險而壤沃自古西寇犯邊若西夏河套之患與宋
明相終始卽此地也公屢剋堅壘賊決黃河從上流灌營幾浸沒公隨
法堵禦督攻馬五寨夷其隘忽飛礮中左脅諸將士昇歸相向哭公叱
曰丈夫死得報

國何哭爲君等第努力滅賊後輿尸歸卽死不恨矣言訖而瞑同治九

正月十五日也事聞

天子軫悼

贈太子少保

子諡忠壯

特命公從子今少司馬錦棠接統其軍血戰期月卒禽馬化澄父子
其心以告公靈而回亂次第就夷相國左恪靖侯入都與余述及公必
往復悲歎謂公忠毅敦實喜功讓能而沈識遠慮超物表尤能銷患
未萌同治七年環慶平涼閒爲回所陷北山董福祥張俊李雙梁者皆
材武忠傑無能自達糾旅自固公乘閒招出之降其眾十七萬餘人而
董福祥今爲名將公之殉難金積堡也堡中時聞戈馬聲如潮水怒沸
月常數次賊不敢解衣臥是年十一月十六日夜半平涼城外大聲震
山谷予時徘徊帳中覺有異旋報是日馬逆就禽毅齋從公習軍事好
學禮士誠懇無飾而武勇健捷尤出意量外天山積雪彌漫平日鳥飛
半墮葉落不墜毅齋與番人戰必身先士卒躡其巔以氈裹身雕擊而
上轂輾而下番人目瞽心悸驚爲神不戰而伏蓋天生異材也靈州故
巖疆予奏以甯夏水利同知分泄之改名曰甯靈廳卽其地建祠祀公

兩廡祀殉難諸將校劃荒絕地二百畝充祀產永以不廢壽昌因思公
之生而治兵其地也可以靖一時之亂公之沒而血食其土也可以靖
萬世之亂非但以雲車風馬盪摩悚惕也其平日篤棊誠摯淪浹既深
勲名之赫赫又昭徹於聽覩故瞻其廟而效節赴義之意油然而生
入其庭而震動恪恭懍乎戢其慝志而罔敢渝隕詩曰暇假無言時靡
有爭又曰來假來饗降福無疆其赫聲濯靈以保我後生者獨一時然
乎哉祠成左公及毅齋屬壽昌爲文其碑而聲之以詩詩曰
北倚賀蘭東互黃河天設茲險巖峻我我公之殄戎歸神於此公之崇
祠有秩其祀爰朱其桷爰丹其楹俎豆告虔暨於百靈黍稷翼翼迄降
康年河流渾渾沛澤窮邊生不私己歿不恤身祠宇千禩用福我民綏
此萌隸娛爾童叟祭祀先祝此敢後公功無儔公業有繼載歌詩
以永勿替

劉忠壯公別傳 李元度

劉公諱松山字壽卿湘鄉人生有智略應募入老湘營隸王壯武鏐
下咸豐六年從克永明江華敘外委七年從克郴州桂陽擢千總
賞藍翎進剿湖北崇通蒲圻以功

賞守備銜充第四旗營將從援江西八年克廣昌樂安等都會壯武卒軍張忠毅運蘭代領其眾公從戰臨江吉水功最遂復撫州建昌及南豐遷游擊

賞換花翎賊自閩回竄江西犯新城分黨陷安仁公從解新城圍遂克安仁遷參將粵賊何觀保李榮澈等踞連州公從忠毅往會剿諸其東殄賊數千禽觀保榮澈暨偽官五十餘人連州平九年自江西轉戰至徽州屯祁門會羊棧嶺賊萬餘人白盧村來犯公首陷賊陣蹀血酣鬪賊大潰奔亡何賊悉悍眾竄踞浮梁及景德鎮六月諸軍攻景德鎮破之窮追三十里將抵浮梁阻於水有橋三賊擁不得卽渡因反鬪城賊出乘之時我軍頗亂次人騎不相屬公獨帥所部扼東橋力戰卻之遂拔浮梁是役也微公幾失利

詔以副將補用十年論連州功

賞加總兵銜及志勇巴圖魯名號十一年從張忠毅進剿徽池克建德

詔擢總兵三月攻徽州分屯民村夜過半賊出劫營呼聲震屋瓦諸軍驚潰公獨帥所部山立不動月下遮諸軍告之曰我第四旗劉某也列

隊在此請無奔奔則爲禽矣軍賴以全公自是名出諸將上督師曾文正以國士待公自此始未幾徽州復并復休甯黟

詔加公提督銜同治元年二月賊圍徽州公從張忠毅赴援圍解得旨下部優敘四月從克旌德十月忠毅以疾歸曾文正檄公與壽州鎮總兵易公開俊分統湘軍守甯國會大疫病者什七八公加意拊循士皆力疾戰守二年八月賊犯涇公帥師迎擊敗賊於金村又敗諸李村會粵賊號花旗者來襲郡城公馳還擊走之當是時皖南羣盜如毛逆渠楊輔清古隆賢賴文鴻等各擁眾十數萬聞公赴涇謀潛師襲甯國不知公已還也公遣將夜出南門設伏敬亭山下又分所部出西門嚴陣以待遲明賊大至公啟北門鼓譟出賊驚卻墜溝死者亡算悍賊仍死拒適西南諸將追賊至夾擊大敗之南門賊亦敗遁歸路爲伏兵所截前阻大江溺死過半九月克甯國縣

詔賞正一品封典

命署皖南鎮總兵四年補肅州鎮尋調皖南粵逆已蕩平而河南北捻匪方棘曾文正以使相督師奏調公總理營務六月師次臨淮七月易公開俊以疾歸公遂總領湘軍與捻賊回賊相終始矣湘軍之平粵逆

也首尾十二三年步卒積功至專閫以千百計久役思歸休又南人不
慣麥食聞勦捻率不樂隨征雖文正亦以軍士積勞久擬資遣或別募
生力軍不强摯以從獨公投袂起立帥所部渡江有譁餉不肯北渡者
公廉得其魁誅數人而事定五年二月公帥師自蒙亳潁川進勦河南
時逆渠張總愚牛洛紅等謀竄山東公急趨濟甯賊回竄徐州四月
擾湖團公會淮軍擊之大捷賊竄豐沛及睢甯公自徐州過之改竄銅
山五月敗賊於魏家莊六月追賊至西華賊分道並出公力戰逾時賊
敗遁追至上蔡之雙廟禽斬亡算賊伏千騎萬金寨旁圖截輜重公與
總兵李祥和等夾擊大破賊進攻雙廟賊悉眾迎敵敗之追奔至洪河
淹斃數千餘賊遁追及鄆師之召陵又破之七月大破賊於南陽新野
得

旨下所司優敘張總愚既不得志於豫乃西犯秦眾十數萬十二月公
奉檄援秦六年三月

詔擢廣東陸路提督時曾文正已解兵柄代之者爲使相李公鴻章張
總愚犯同州朝邑陝軍迎擊於灞橋失利公帥步卒數千疾趨入關及
賊於晉成堡姜彥村張兩翼前進賊敗追至許家莊小壕奪其堡賊仍

糾黨旅拒勢張甚公督將士血戰四時之久賊大奔同朝圍解
優詔賞玉柄小刀火鐮大小荷囊諸珍品秦中自同治初元逆回構亂
所屬無甯字益以捻禍官軍屢被挫會城岌岌公至一戰解同朝之圍
大局以定然賊燄尙熾也七月公會諸軍追賊蒲城東北敗諸索家村
又敗諸昌甯村追至富平殪賊二千有奇賊奔三原踰高陵沿渭水北
岸晝夜東走公追及數敗之九月賊陷綏德州公攻之急棄城遁十一
月賊由宜川踐冰渡河遂入山西陷吉州鄉甯公疾馳數百里一戰復
吉州鄉甯賊聞公至走河津稷山攻其城垂破矣公掩至賊又敗奔十
二月追賊至平陽喬李鎮敗之賊趨洪洞公夜帥所部繞出賊前攻原
店賊巢詰旦壓巢而陣賊慮公軍追躡不意出其前也睡夢中驚潰追
擊至康衢阻小溪賊馬步爭渡陷淖中禽斬亡算賊遂回竄平陽絳絳
縣出橫嶺關東犯直隸清苑境矣時陝甘總督左公宗棠帥師入衛檄
公繞越太行出賊前七年正月公冒雪兼程進日行百數十里抵保定
直督以聞

命交部先行優敘賊擾獻縣商家林公擊敗之賊竄深州聞公至復西
南竄公破賈城村賊巢十餘處賊走祁州公回軍追勦會援賊至我師